

Testimunianza

A notte pianu pianu, spaghje lu so mantellu
Per sti boschi spugliati, tracarchi di sognu
Spentu l'ultimu fiatu, si sventa la cucagna,
In fondu di lu celu, spunta a prima stella.

Per sti bughjali nudi, chì u freddu ha sicatu
Ùn si sente un fiatu, u silenziu nasconde,
E u frombu di u fiume, chì fughj'à mezz'e sponde,
Ribomba per i chjassi chì a brina ha cutratu.

Per sti paesi persi, arrimbatì à l'eternu
U tempu s'hè firmatu, lascendu tuttu apertu
Ste case fallate, sti carrughji diserti
Fermanu testimoni, soli nant'un quadernu.

Sè tempurale soffia, certe volte si sente
Cullendu per i chjassi, u passu di u pastore,
U sò spiritu chì corre, trascina u so dolore,
S'anima ferita, si sgassa ind'è mente.

Certi ghjorni si sente, purtati da li venti
U pientu di a terra, chì mugħja u so lamentu,
A so chjama si spaghje è corre nanta l'onda
Per fà cresce in le mente, a sperenza di u mondu.

A l'aggrotu d'un scogliu, hè natu un fiore biancu
U so lume risplende, si span'in la natura,
E a brina chi sguile, cun fede annacquerà
Sumenta in lu mondu, per spaghje LIBERTÀ ...